

EDITORIAL

Palapdon ang kalihukang protesta aron tapuson ang rehimeng US-Marcos!

Padayon nga gitay-og sa pulitikanhong krisis ang reaksyunaryong estadong gidumalahan sa mga burukrata-kapitalista. Wala nahubas ug matag-karon-ug-unya nga miulbo ang kasuko sa masa sa nangabutyag nga mas daghang kaso sa korapsyon. Wala naupos ang mga *walkout* sa mga estudyante, hinunua mikuyanap pa kini sa mga unibersidad sa Maynila ug uban pang bahin sa nasud. Nagakaylap ang protesta sa mga grupong sibiko, tawong simbahan, mamumuo, mga kabus ug uban pang sektor.

Natukod ang lapad nga alyansa nga desididong kab-uton ang hustisya alang sa katawhang biktima sa kriminal nga korapsyon. Nagbarog na ang usa ka lapad ug gamhanang kalihukan sa katawhan nga motay-og sa rehimeng US-Marcos ug motapos sa paghari sa mga burukrata-kapitalistang paksyon nga anaa sa poder.

Nanghunaw ug nagpaaron-ingnon si Marcos nga nakurat o nasuko sa mga pagpangawat. Walay kapuslanan sa katawhan ang sikretong imbestigasyon sa gitukod niyang "independent commission" nga klarong walay laing laraw kundili tabunan ang kama-tuuran nga bilyun-bilyong piso nga porsyento sa maanomalyang kontrata ang nagasaka sa Malacañang, ug nga mismong si Marcos ang hari ug anaa sa pungkay sa nagtabunok nga basura sa korapsyon. Tulo ka bulan human niyang ideklarang "kaulaw pud mo," tin-aw sa mata sa katawhan nga si Marcos mismo ang numero unong walay ulaw ug pinakahangol sa pagbalsa sa binilyong pisong pondo sa

katawhan.

Pugos nga ginasakyan sa paksyong Duterte ang lapad nga protesta sa katawhan apan dyutay lamang ang ilang nalingla. Dili nila matabunan ang kaugalingong krimen ug korapsyon, ilabina niadtong nakalingkod isip presidente si Rodrigo Duterte. Subling nabutyag ang binilyong gibulsa sa mga Duterte sa kontrata sa Pharmally niadtong panahon sa pandemya, ₱51 bilyon *flood control project* ni Paolo Duterte ug ₱125 milyong *confidential and*

intelligence fund ni Sara Duterte. Binilyong pisong kontrata usab ang napadulong sa alalay kaniadto ni Duterte nga si Bong Go, ug uban pang mga alyado.

Atubangan sa kaylap nga diskurso aron pulihan ang nagharing rehimen, gipakita sa imperyalismong US nga lig-on niining ginasuportahan ang papet niining si Marcos. Bag-o lang, personal nga gibisita sa usa ka opisyal sa embahada sa US ang pagdungog sa ICI isip timaan sa suporta niini.

Grabe na ang kasuko sa katawhan nga taliwala sa grabeng korapsyon, dayag nga gisubli ni Marcos ug mga kakunsaba niya sa kongreso ang pagsal-ot sa klase-klaseng *pork barrel* sa badyet sa 2026. Pugos gisal-ot ang ₱281 bilyong *pork barrel* ni Marcos sa porma sa *unprogrammed appropriations, confidential and intelligence funds* ug uban pa. Anaa sa ₱414 bilyon usab ang *pork barrel* nga bahin-bahinon sa korap nga mga kongresista ug senador.

Padayon nga nabutyag ang tanang programa sa guberno nga puno sa korapsyon. Gawas sa mga proyektong *flood control*, bilyun-bilyong piso usab ang gikawkaw sa mga *farm-to-market road, multipurpose building, health center, tulay, kalsada, ingonman* sa pondo alang sa ayuda, sweldo, pensyon ug seguro.

Labaw nga nasayod ang katawhan kung kinsa ug asa ang maong mga proyekto nga gikurakot sa mga korap nga opisyal sa guberno ug militar ug mga kakun-



sabo nilang dagkung negosyante. Sa pagtinabangay sa lain-laing sektor, kining tanan angay susihon, idokumento, ibutyag ug itamparus sa mga kriminal nga burukrata-kapitalista.

Kinahanglang dili undangan sa mga Pilipino ang pagpaningil ug pagpanubag sa mga burukrata sa ilang mga kalihukan ug protesta. Kaagbay ang mga kabatan-onan, kinahanglang dugang pakusgon sa masang kabus ug mga mamumuo ang ilang tingog batok sa korapsyon, burukratang kapitalismo ug pasismo, ug aron palanugon ang singgit alang sa pagtapos sa paantus nga rehimeng US-Marcos ug paghari-hari sa mga Duterte.

Mipakaylap kini sa mga kabus nga komunidad ug pabrika, kung asa pinakadaghan ang nasuko nga masang anakpawis nga biktima sa korapsyon ug kunsabuhay sa mga burukrata-kapitalista ug dagkung negosyante. Gawas sa isyu sa paglunop sa mga komunidad nga resulta sa korapsyon ug palpak nga gubyerno, kinahanglang hatag duut ang isyu sa ubos nga suhulan, kaylap nga disempleyo sa kabatan-onan, pagmahal sa mga palaliton, pagtaas sa gasto sa edukasyon, walay puas nga pagsaka sa presyo sa gasolina, duot nga katilingbanong serbisyo ug

uban pa nga bunga sa kunsabuhay sa mga korap nga burukrata-kapitalista ug hakog sa ganansya nga dagkung burgesya.

Palapdon pa ang kalihukang protesta batok sa korapsyon sa pinakadaghan prubinsya, sa mga lungsod ug syudad. Milyun-milyon ang biktima sa palpak ug dili magamit nga mga imprastrukturang gigastuhan sa kwarta sa katawhan. Hugpungon ang ilang kasuko sa mga katalagman nga nasinati nila sa kadaut sa mga bagyo, linog o bisan sa simpleng pag-ulan. Panubagon ang mga burukrata-kapitalista sa ilang mga krimen nga nagbunga sa pagkaunlod sa mga komunidad ug sakan sa baha, pagkahagba sa mga tulay, pagkaguba sa mga kalsada, pagdahili sa mga bilding ug panimalay ug uban pa. Hugot nalambigit ang burukrata-kapitalismo sa pagkapurdoy sa mga mag-uuma, ubos nga suhulan sa mga mamumuo, pagtiurok sa kita sa mga drayber, pagkahagba sa panginabuhing mga kabus, pagkawala sa puloy-anan, pagkalubong sa utang, dislokasyon ug pagpalayas sa yuta, ug daghan pang porma sa kapit-os.

Dapat isumpay sa mga estudyanteng kabatan-onan ug uban pang sektor nga mibarog batok sa



korapsyon ang ilang han-ay sa kusog sa masang kabus sa kasyudaran ug kabanikanhan. Kung aduna may labing gikahadlukan si Marcos nga motay-og sa iyang paghari, kini mao ang dungan nga pag-walkout sa mga estudyante, pag-alsa sa mga mamumuo, martsa sa mga mag-uuma, welga sa mga empleyado sa gubyerno, magtutudlo ug akademiko, hunong-byahe sa mga drayber sa pangpublikong transportasyon ug uban pang porma sa hiniusang aksyon sa katawhan.

Lig-ong nagaabante ang nagbalud-balod nga kalihukang protesta sa katawhan batok sa korapsyon ug burukrata-kapitalismo tungod sa pagpanguna sa mga nasudnon-demokratikong organisasyon ug aliyansa. Sila ang pinakadeterminado ug pinakamatinguhaon sa pag-abot ug pagpukaw sa masa. Sila ang labing nanglimbasog nga tukuon ang pinakalapad nga panaghiusa sa katawhan batok sa rehimeng US-Marcos.

Samtang ginapabwelo ang kalihukang protesta, kinahanglang ilunsad sa mga nasudnon-demokratikong pwersa ang lagsik nga kalihukang pagtuon sa katilingban ug rebolusyong Pilipino sa han-ay sa masa. Kinahanglang walay kapuol nga ipatin-aw nga ang korapsyon ug kahiwian natural sa semikolonyal ug semipyudal nga sistema, ug nga mahanaw lamang sa pagtapos sa imperyalismo, pyudalismo ug burukrata-kapitalismo.

Ang tinguha sa katawhan nga kausaban sa sistema makab-ot lamang sa pag-asdang sa demokratikong rebolusyon sa katawhan pinaagi sa armadong pakigbisog. Maong kinahanglang tukuron ang pinakadaghan balangay sa mga organisasyon sa National Democratic Front sa ilang han-ay ug hugot nga suportahan ug pakusgon ang Bagong Hukbong Bayan. Kinahanglang palalumon ug palapdon ang paggamot sa Partido sa han-ay sa masa aron magsilbing dugukan ug uyok sa ilang malungtarong pakigbisog.

AB

 <p>Bol. LVI Ihap 20 Oktubre 21, 2025</p> <hr/> <p>Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p>	<h2 style="text-decoration: underline;">Unod</h2> <p>Editoryal: Palapdon ang kalihukang protesta aron tapuson ang rehimeng US-Marcos 1 Mga kabatan-onan: Marcos-Duterte, pahawaon! 3 Mga protesta kontra korapsyon, nagkalapad 3 Kabatan-onan alang sa nasudnong demokrasya 4 ISM, gipig-ot sa rehimeng Marcos 5 Korapsyon sa burukrata-kapitalistang militar 6 14th IB, giambus sa BHB-Leyte 7 Lider-rebolusyonaryo sa Panay, giparangalan 7 Panawagan sa mga mag-uuma 7 Mga propesyunal para sa DRB 8 Sa mubong pagkasulti 9 6 ka dekadang kadaugan sa ma-uuma sa EV 10 Hunong-buto sa Gaza, dili igo 11 Interim release para kay Duterte, gibasura 11 Mga protesta 11 Pakanang destabilisasyon sa US sa Venezuela 12</p>
<p>Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas</p>	
 ang.bayan@cpp.ph	

Singgit sa kabatan-onan: Marcos-Duterte, pahawaon!

Kapin 5,000 ka kabatan-onan ug estudyante ang nagmartsa paingon sa Mendiola sa Maynila niadtong Oktubre 17 isip kabahin sa National Youth Day of Action Against Corruption. Gipangunahan sa mga nasudnon-demokratikong organisasyon, mga konseho sa mga estudyante ug alyansa, ang panawagang: "Marcos-Duterte, pahawaon! Dunot nga sistema, usbon!"

Nag-*walkout* ang mga estudyante ug naglunsad og lokal nga programa sa ilang mga unibersidad sa wala pa miadto sa Mendiola. Misalmot sa protesta ang mga grupo ug estudyante gikan sa 28 ka pangpubliko ug pribadong unibersidad sa Metro Manila.

Gikasa usab sa mga estudyante ang *walkout* ug mga piket protesta sa Baguio City, Nueva Ecija, Rizal, Cavite, Batangas, Laguna, Quezon, Cebu City, Iloilo City ug Davao City. Tataw dinhi ang kapin 700 ka estudyante, magtutudlo ug mga empleyado nga nag-*walkout* sa Central Luzon State University sa maong adlaw.

Pipila ka adlaw ayha niini, naglunsad og laing *walkout* ang mga estudyante sa Polytechnic University

of the Philippines (PUP) System (15,000), De La Salle University sa Maynila ug Laguna, University of the East (UE)-Manila, Our Lady of Fatima University, De La Salle-College of St. Benilde ug Mapua University. Nag-*walkout* usab ang mga estudyante sa De La Salle Araneta University sa Malabon City niadtong Oktubre 20. Sa kinatibuk-an, gibanabana nga kapin 40,000 ka estudyante ug kabatan-onan sa ti-buok nasud ang misalmot sa kalihukang *walkout* batok sa korapsyon sukad Setyembre.

Dili mapukan ang kabatan-onan bisan pa sa pagsulay sa rehimeng Marcos nga sumpuon sila. Gipadayon nila ang mga protesta taliwala sa mga report sa sunod-sunod nga mga

"bomb threat" sa mga unibersidad ug eskwelahan sa daghang prubinsya aron pugngan ang nagkadaghan ug nagkanunay nga mga protesta.

Gisaway usab nila ang pagpangumpo sa estado, lakip na ang pagpatawag sa Philippine National Police sa mga lider kabatan-onan ug midya sa kampus tungod sa ilang pagsalmot sa protesta ug kumprontasyon sa Mendiola, Maynila niadtong Setyembre 21. Lakip sa gipatawag sa mga pulis mao ang usa ka midya ug estudyante sa PUP ug organisador sa grupong Kalayaan Kontra Korapsyon.

Niadtong Oktubre 12, nagtapok ang mga biktima sa kabangis sa mga pulis, kadaghanan kabatan-onan, sa protesta sa Setyembre 21 nga gitawag og Mendiola 277. Kauban ang ilang mga pamilya, mga abogado ug grupo sa tawhanong katungod, gitukod nila ang Alyansa laban sa Korapsyon at Brutalidad ng Pulis o AKAB. AB

Mga protesta sa katawhan kontra korapsyon, nagakaylap

Gawas sa protesta sa mga kabatan-onan ug estudyante, nagpadayon usab ang protesta batok sa korapsyon sa mga mamumuo, kabus sa kasyudaran, mag-uuma, mangingisda, tawong-simbahan ug uban pang sektor. Matud nila, magpadayon ang mga protesta hangtud walay manubag nga mga korap sa ilang mga krimen batok sa katawhan.

Niadtong Oktubre 7, mikabat sa 17,000 ang misalmot ug miduyog sa martsa ug misa sa Baguio City. Duha ka adlaw human niini, nagmartsa usab ang mga residente sa San Jose Del Monte City sa Bulacan.

Niadtong Oktubre 11, kapin 3,000 ang mitambong sa pag-ampo batok sa korapsyon sa Bacolod City. Sa samang adlaw, liboan ka mga debuto ug tawong-simbahan ang miapil sa pagbaktaw para sa hustisya batok sa korapsyon sa Sampaloc sa Maynila. Gilunsad usab sa Albay ang usa ka martsa.

Niadtong Oktubre 12, naglunsad og baktas batok sa korapsyon sa Santiago City, Isabela diin kapin

500 ang miapil sa aktibidad. Sa samang adlaw, gipahigayon usab ang usa ka rali sa Meycauayan, Bulacan. Duha ka adlaw human niini, gipahigayon ang *fluvial parade* sa Manila Bay sa mga mangingisda sa Cavite.

Niadtong Oktubre 17, nagkasa og protesta ang mga unyon sa mga mamumuo ilalum sa Kilusang Mayo Uno sa Laguna. Usa ka rali usab ang gipahigayon sa mga progresibong grupo sa Cebu niadtong adlaw. Usa ka adlaw pagkahuman, gipahigayon ang usa ka protesta sa La Trinidad Public Market sa Benguet.

Niadtong Oktubre 19, liboan ang mitambong sa martsa ug pag-

ampo batok sa magun-ubong *dredging*, korapsyon ug dinastiya sa pulitika sa Vigan City, Ilocos Sur. Human sa usa ka adlaw, gipahigayon sa mga inahan ug babaye ang usa ka zumba batok sa korapsyon sa Quezon City.

Nagpadayon usab ang Black Friday Protest sa mga progresibong grupo. Gilunsad usab sa simbahan ning bag-o ang ilang bersyon sa protesta matag Biyernes.

Gipahibalo sa United People Against Corruption niining bulana ang plano nga magpasaka og *indemnity class suit* batok sa mga kongresista, kontratista ug upisyal sa guberno nga nalambigit sa mga anomalya sa mga *flood control project*.

Sa Hong Kong ug Canada, gitukod usab sa mga grupong Pilipino niining Oktubre ang mga alyansa nga kontra sa korapsyon sa Pilipinas. AB

Kabatan-onan sa komunidad, makigbisog alang sa nasudnong demokrasya

Niadlong Setyembre 21, misulbong sa tiilan sa Mendiola ang nag-awas-awas nga kasuko sa kabatan-onan batok sa lapad nga korapsyon ug kakulang sa pagpanubag sa pinakataas nga upisyal sa nasud. Daghan kanila naggikan sa mga kabus nga komunidad. Puno sa kaisog ug militasya, gikumpronta nila ang mga pulis nga dugay nang nangdaugdaug sa sama nilang kabus. Klaro sa ilang panglantaw nga ang mga pulis ang tigpanalipud sa mga mapahimuslanon nga nagharing hut-ong. Wala sila nahadlok. Wala gitagad ang mga targas, bomba sa tubig, ug mga batuta. Tin-aw alang kanila ang kahusto sa pakigbisog.

Sumala sa datos sa estado niadtong Hunyo 2025, mga 20.2 milyon ang mga kabatan-onan o edad 15-24 anyos gikan sa kinabuk-ang populasyon sa nasud nga 116.9 milyon. Sa ila, 19.66 milyon ang nag-ilaid sa kalisud. Mga 7.2 milyon ang kabatan-onang wala nag-eskwela, samtang mga 2.36 milyon ang parehong wala nag-eskwela ug wala nagtrabaho, diin 50.3% niini lalaki ug 49.7% babaye.

Tungod sa grabeng kalisud, napugos ang mga kabatan-onang Pilipino nga sayong mangita ug trabaho kaysa mag-eskwela. Apan daghan kanila walay makitang disentang trabaho tungod sa krisis sa atrasadong ekonomiya. Sila ang dakung bahin sa hut-ong semi-proletaryado. Kabahin sila sa lapad nga reserbang hukbo sa pamuo sa kasyudaran. Mikita lamang sila sa pagsulod sa bisan unsang dili regular nga trabaho. Ang uban napugos sa mga ilegal nga binuhatan tungod wala silay laing tinubdan.

Ang mga kabatan-onang kabus, uban sa ilang pamilya, walay hustong puy-anan. Gatasan ka libong pamilya ang nagpuyo sa mga lugar nga ginalunop kada kusog ang ulan. Bangsi nga ginademolis ang ilang mga komunidad o kaha ginasunog ang ilang mga panimalay aron sila mapalayas ug ibaligya ang yutang gikahimutangan sa dagkung kumprador ug langyawng negosyan-
te.

Sama sa ilang mga ginikanan, biktima sila sa korapsyon, pagpasagad ug pasismo sa estado. Sila ang mga nakasaksi ug biktima sa maduguong gubat kontra droga sa kanhing rehimeng Duterte nga nagpadayon hangtud karon. Kasagaran silang target sa abuso ug brutalidad sa mga pulis ug ginagamit sa ilang ilegal nga aktibidad. Sama sa mayorya sa katawhan, nangandoy sila og katilingbanong kausaban ug nasayud sila, isip kabatan-onan, sa ilang katungdanan nga usbon ang katilingban.

Ang papel sa kabatan-onan sa pagpaasdang sa nasudnong demokrasya

Importante ang papel sa kabatan-onan sa pakigbisog sa katawhang Pilipino alang sa nasudnong kagawasan ug demokrasya. Matud ni Jose Maria Sison, nangulo sa pagtukod sa Kabataang Makabayan ug sa Partido Komunista ng Pilipi-



nas, kinahanglang mag-organisa ang kabatan-onan aron batukan ang mga kontra-katawhang palisiya ug panalipdan ang ilang kaayuhan isip kabatan-onan ug kabahin sa katawhan.

Niadlong dekada 1960, nangu-na ang Kabataang Makabayan sa paglunsad sa mga nasudnong demokratikong pakigbisog. Militante kining nagdumala ug nag-organisa sa kabatan-onan sa mga eskwelahan, pabrika, propesyunal ug komunidad. Human gipahamtang ang balod militar, daghan sa mga myembro niini ang miadto sa kabukiran ug nahimong binhi sa Bagong Hukbong Bayan sa lain-laing bahin sa nasud.

Sa pabatok diktadurya gikan dekada 1970 hangtud 1986, mitumaw pa ang daghang mga grupong kabatan-onan nga nanalipud ug nagsakripisyo aron tapuson ang rehimeng US-Marcos. Gawas sa mga organisasyon sa mga eskwelahan, gitukod sa kabatan-onan ang mga organisasyon sa komunidad. Lakip dinhi ang Kadena (Kabataan para sa Demokrasya at Nasyunalismo) nga nakabase ug gitukod sa kabatan-onan sa mga komunidad. Gitukod kini niadtong 1984 sa Silang, Cavite aron hiusahon ang lain-laing grupo sa kabatan-onan sa komunidad isip kabahin sa pakigbisog alang sa nasudnong demokrasya.

Militante nga nag-organisa ug nagmobilisa ang Kadena sa gatasan ka kabatan-onan sa sentrong syudad ug paspas nga nakapalapad ang kalihukan sa lain-laing bahin sa nasud sama sa Southern Tagalog ug Visayas. Kabahin

Sundi sa panid 5

Internasyunal nga delegasyon, gipig-ot sa rehimeng Marcos

Gihasi ug gihadlok sa mga elemento sa Armed Forces of the Philippines ang mga delegado sa International Solidary Mission (ISM) nga naglunsad ug imbestigasyon ug pagtuon gikan Oktubre 11 hangtud 14. Anaa sa Pilipinas ang delegasyon aron mahibal-an ang nasinating krisis sa klima, pagkawaw sa kinaiyahan, ug militarisasyon sa komunidad sa mga mag-uuma ug lumad sa Rizal, ug sa mga isla sa Mindoro, Samar, Leyte ug Negros.

Dayag nga gitiktikan ug gipikyuran sa mga sundalo ang mga binyu sa aktibidad sa ISM. Gikuha nila ang mga ngalan sa mga delegado, gisundan sa mga armado ug gisubaybayan hangtud sa ilang gipuy-an. Pila ka beses usab silang nagpalupad og *drone* ibabaw sa mga tulda diin gihimo ang mga imbestigasyon.

Niadlong Oktubre 14, napugos ang mga delegado nga tapuson ang ilang aktibidad sa Mindoro tungod sa pag-abot sa daghang mga pulis ug sundalo nga nagdala og tag-as nga mga pusil sa kampuhan. Nagresulta kini og dakung kahadlok sa mga lumad ug delegado. Sa Rizal, dayag silang gipugngan nga maglunsad og aktibidad tungod kay wala silay “permit.” Sa paghawa sa mga delegado, padayon nga gitugaw sa mga sundalo ang mga Mangyan sa Mindoro ug Dumagat sa Rizal.

Sumala sa taho sa mga Dumagat sa Tanay, Rizal, sige ang presensya sa militar sa komunidad ug gisugdan ang pagpatawag sa mga residente alang sa interrogasyon human sa ISM. Sa Abra de Ilog, Occidental Mindoro, nagpadayon ang pagpamig-ot sa mga sundalo sa komunidad nga nakaapekto sa panginabuhi sa mga residente ug nagdala og kagutom sa mga mag-uuma.

Dungan sa pagpanghasi sa ISM, walay hunong usab ang pag-abuso sa militar sa ubang bahin sa nasud.

Pasistang pagpangatakke sa Negros. Walay puas ang kadaut ug pasistang atake sa mga sundalo sa isla sa miaging mga bulan. Narekord ang daghang mga kaso sa paglapas sa tawhanong katungod atol sa mga operasyong kombat niini sa daghang barangay.

Labing bag-o dinhi mao ang pagpamusil sa 79th IB nga miresulta sa pagkaangol sa mag-uumang si Kato Rizal ug iyang menor de edad nga pag-umangkon samtang nanguha og dugos sa Sitio Nabaisan, Barangay Minapasok, Calatrava, Negros Occidental sa buntag sa Oktubre 17. Sa katapusang report, wala pa nasuta ang nahimutangan sa menor de edad.

Niadlong Oktubre 7, gipangransak sa 94th IB ang balay sa usa ka mag-uuma sa Sitio Manluki sa Barangay Carabalan. Usa pud ka mag-uuma ang gidakup sa 94th IB sa Barangay Buenavista ug pugos nga gipagiya sa operasyong kombat. Sa Toboso, pugos nga gisulod ug giransak sa 79th IB ang mga balay sa duha ka mag-uuma niadtong Oktubre 11. Sa Negros Oriental, nataho ang pagpangutingkay ug pagkampo sa 62th IB sa mga sentro sa komunidad, simbahan ug eskwelahan.

Paglapas sa IHL. Ginapaantus ug ginapig-ot sa 703rd IBde ang pamilya ug mga grupo sa tawhanong katungod sa pagbawi sa patayng lawas sa usa ka giingong Pulang manggugubat nga napatay sa engkwentro sa militar ug BHB sa Norzagaray, Bulacan niadtong Oktubre 17. Gikundena sa mga grupo sa tawhanong katungod ang pagdumili sa militar sa paghatag sa patayng lawas sa pamilya ug militarisasyon sa punerarya nga nahilunaan niini. Nagkayamukat usab ang mga pasumbingay sa militar bahin sa nahitabong panagsangka ug paghatud sa patayng lawas.

Sa North Caloocan, migrabe ang militarisasyon sa NTF-Elcac ug sa 12th Civil Military Operation sa mga barangay sugod Oktubre 6. Giokupa sa militar ang Barangay 175, 181-182 Pangarap Village ug Barangay 187-188. Gilunsad niini ang kampanya sa *Red-tagging* ug pagpamig-ot sa mga myembro sa progresibong grupo.

Pagpatay. Brutal nga gipatay sa kalalaken-an nga sakay sa motorsiklo si Niruh Kyle Antatico niadtong Oktubre 10 sa Barangay Patag, Cagayan de Oro City. Si Antatico usa ka kanhing *senior legal researcher* sa National Irrigation Administration Region 10 nga giingong nagbutyag sa daghan kaayong korapsyon ug anomalya sulod sa ahensya lakip na ang nangawalang pondo, mga *substandard* nga proyekto, ug mga pekeng kontrata. Nangayo og hustisya ang Nafeda-Courage alang kang Antatico. AB

Gikan sa panid 4

sila sa pagpalagpot sa diktaduryang Marcos niadtong 1986. Nahunong ang pag-organisa sa Kadena tuig 1990. Sa luna nga gibyaan niini, natukod ang organisasyong Anakbayan, nga nag-organisa sa kabataan-onan sa komunidad ug nahimong kabahin sa pagpalagpot sa rehimeng Estrada niadtong 2001.

Napamatud-an sa mga grupong Kabataang Makabayan, Kadena ug uban pang organisasyon nga ang komunidad mao ang dili mahubsang atabay sa militanteng kabataan-onan nga maisugon ug mapangahangong nag-asdang sa nasudnon-demokratikong tinguha sa katawhan.

Sa gipakitang militansya niadtong

Setyembre 21, siguradong molig-on pa ang kalihukan sa kabataan-onan, ilabina gikan sa kabus nga mga komunidad, nga moadto sa kadalanan ug kabukiran aron ipakigbisog ang tinuod nga katilingbangong kausaban ug kagawasan nga dugay nang gihandum sa bagang duut sa katawhan. AB

Nangalisngaw nga korapsyon sa burukrata-kapitalistang militar

Sa pagbusikad sa korapsyon sa burukratikong kapitalistang sistema, dili ikatingala ang dungan nga pag-alingasaw sa baho sa mga burukrata-kapitalista sa han-ay sa militar. Nabutyag bag-o lang ang kahiwian sa proyektong imprastraktura nga gikalambigit sa Armed Forces of the Philippines (AFP) kakunsaba ang mga korap nga kontraktor. Nabutyag usab nga kini adunay dakung bahin (P50 bilyon) sa *unprogrammed appropriations* alang sa 2026 gikan sa *pork barrel* sa presidente.

Mokabat og P15 bilyon ang gikawat ug giusik-usikan sa 944 ka imprastrakturang militar ubos sa Tatag ng Imprastraktura para sa Kapayapaan ug Seguridad (TIKAS) Convergence Program gikan 2023 hangtud karon. Nabutyag sa *hearing* sa senado nga 421 niini mga *ghost project* samtang ang 648 nga gilista isip "nahuman na" bisan og mihunong ang konstruksyon sa sinugdang ang-ang ug dili mapuslan.

Ginailad sa hepe sa AFP nga si Romeo Brawner Jr ang katawhan sa pagsulting walay kalambigitan ang militar sa pagpangawkaw sa pondo sa TIKAS, bisan pa nga ang mga kumander sa AFP Unified Command ug ang mga rehiyonal nga direktor sa Department of Public Works and Highways (DPWH) mao ang nagtakda kung unsa ug asa itukod ang mga proyekto niini. Parehong ginadumalahan sa Department of National Defense (DND) ug DPWH ang pagtino sa mga sumbanan, pagplano, ug pag-monitor sa implementasyon pinaagi sa TIKAS Central Technical Working Group. Ingonman, tanang proyekto sa TIKAS nahimutang sulod o palibot lamang sa mga kampo sa militar.

Korapsyong kinaiyanhon sa burukrasya

Sama sa pareho nilang mga korap sa sibilyang burukrasya, gigamit sa mga burukrata-kapitalista sa militar ang ilang posisyon sa estado aron makakawkaw og bahandi. Gitukod sa imperyalismong US ang pasistang AFP niadtong 1935 aron magsilbing haligi sa gubyernong Komonwelt, nauna pa sa gitukod niining papet nga estado niadtong

1946. Midaku kini ubos sa diktaduryang Marcos Sr ngadto sa 142,000-sundalo alang sa bangis nga pagpamtuman sa balaod militar. Sukad niadto, padayon kining gipatagbaw sa sweldo, kontrata, ug pabor sa nagpulipuling mga nagharing pakasyon gikan kang Corazon Aquino hangtud sa kasamtangang rehimen.

Sa milabay nga mga dekada, nadokumento ang paghakop sa mga heneral sa sobra ka mahal nga mga kontrata sa pagpalit sa mga himang militar, sama sa mga pusil, howitser, *armored vehicle*, *jetfighter*, helikopter, ug barko. Nabutyag nga ang mga heneral nakakolekta og 10-30 porsiyentong kikkab sa mga kontrata alang sa bala ug pusil. Kaylap ang mga *ghost delivery* sa mga suplay, peke nga mga transaksyon alang sa mga armas ug kagamitan, ug pakigkonsabo sa mga supplier ug kontraktor. Niadtong

2011, nabutyag ang kahiwian sa tradisyon sa "pabaon," diin kada tuig ginatigum ang P1.5 bilyon nga badyet sa DND isip ganti sa mga retiradong heneral. Bisin ang pensyon sa mga sundalo nga hingpit nga gipondohan sa estado gikawat pinaagi sa pagbayad sa libo-libong "ghost retiree."

Ganahan ang mga heneral sa pagpatukod og mga magarbong upisina ug pagpanindot sa mga kampo nga tinubdan nila sa dagkung kikkab. Nabantog usab sila sa kanunay nga pagbakasyon sa gawas sa nasud kauban ang ilang mga pamilya, mahalon nga mga sakyanan ug balay, ug sa kinatibuk-an, magarbong estilo sa kinabuhi.

Niadtong 2018, laing senador ang nagbutyag sa lapad nga korapsyon sa "Davao Group," usa ka grupo sa mga heneral nga suod kang Rodrigo Duterte, sa pagpalit og mga armas ug gamit-militar sa ngalan sa "modernisasyon" sa AFP. Karong Oktubre, gipasakaan og kaso sa Ombudsman ang koronel nga nagsilbing hepe sa grupo sa seguridad ni Sara Duterte tungod sa iyang kalambigitan sa pagpangawkaw sa bise presidente sa P125 milyong *confidential and intelligence funds*.

Kunsabuhay sa AFP ug NTF-Elcac

Daku usab ang ginabulsa sa mga upisyal sa militar gikan sa mga programang kontra-insurhensya sama sa E-CLIP nga ginagamit alang sa pekeng programa sa "pag-pasurender" sa mga sibilyan ug mga proyektong imprastraktura sa Barangay Development Program sa NTF-Elcac.

Sa kaso sa BDP, ang mga yunit sa AFP mao ang nagatada kung asa nga mga barangay ibutang ang *farm-to-market road* (FMR). Daghahan niini mga *ghost project*, samtang ang uban duplikasyon, gipasobraan ang presyo, ubos ang kali-

Sundi sa panid 7



14th IB, gi-ambush sa BHB-Leyte

SA LIMA KA metros, gipabuthan sa usa ka yunit sa Bagong Hukbong Bayan (BHB)-Leyte Island (Mt. Amandewin Command) ang pasistang tropa sa 14th IB sa lungsod sa Javier, Leyte niadtong Oktubre 15 sa buntag. Sumala sa yunit, daghan ang natala nga mga kaswalti sa mga berdegong sundalo.

Ang yunit sa 14th IB nga naa sa maong lugar nagpahigayon kaniadto sa gitawag og *combat-clearing operations* sa mga buntod ug suba sa tunga-tunga sa Barangay Odiong ug Barangay Caraye sa Javier. Kabahin ang maong operasyon sa lapad nga operasyong kombat sa 14th IB sa mga barangay nga sakop sa mga lungsod sa Javier ug Abuyog.

Maluibon ug tinalawan nga gipunting sa 14th IB ang ilang pag-atake sa sibilyang katawhan sa Barangay Caraye, Javier. Human sa opensiba sa BHB, gipahamtang sa 14th IB ang komunidad og *hamlet* o “lockdown” diin gidid-an ang masa nga moadto sa ilang umahan.

Aron tabunan ang ilang kapildihan, nagpakana ang 14th IB ug 802nd IB nga sila adunay nakumpis-kang riple gikan sa BHB sa pag-atake. Nagpagawas pa ang militar og mga pekeng imahe sa social media nga nagpakita sa mga pusil nga “nabiyaan” kuno sa BHB.

Gikan sa panid 6

dad, ug gibutang sa dili luwas o dili haum nga mga bahin sa barangay. Ang mga batalyon sa AFP mao ang nagsilbing gwardya niining mga proyekto.

Sa Northern Mindanao, pananglitan, gihatagan og ₱17.6 bilyong pondo ang AFP ug NTF-Elcac alang sa 142 ka FMR niadtong 2020. Daghan sa mga barangay nga natanyagan niini adunay mga kampo, detasment, o presensya sa RCSP sa AFP. Ang pinakamahal niining mga FMR nagkantidad og ₱67.5 milyon kada kilometro, lima ka pilo nga mas mahal kung itandi sa nasudnong aberids. Halos tanang mga kontrata gihakop sa Ulticon Builders, nga suud sa kanhing rehimeng Duterte.

Sa Samar, miabat og upat ka tuig ayha nahaman sa NTF-Elcac niadtong 2024 ang pagsemento sa 400-metros nga kalsada nga gibutang sa mga sundalo sa tunga-tunga sa basakan. Ang proyekto nagkantidad og ₱14 milyon, o ₱35,000 kada metro. Misangko lamang ang kalsada sa tumoy sa kasikbit nga barangay ug layo kaayo sa mga sentro sa lungsod.

Sa samang higayon, gikurakot usab sa mga sundalo ang pondo alang sa mga gipasurender nilang mga sibilyan. Bisan ang mga ayudang bugas ug delata gipapiktyuran lang nga kunuhay giapod-apod pero bawion ra usab human sa mga parada ug pasundayag nga mga seremonya batok sa rebolusyonaryong kalihukan. AB

Lider-rebolusyonaryo sa Panay, gipasidunggan

GIPASIDUNGGAN sa Komiteng Rehiyon sa Panay sa Partido Komunista ng Pilipinas ang usa sa mga talagsaong lider sa rebolusyonaryong kalihukan sa rehiyon, si Roberto Moises Cabales (Kaubang William), nga gipatay sa militar ug pulis niadtong gabii sa Oktubre 5 sa Barangay Coto, Lambunao, Iloilo. Gipagawas sa mga pwersa sa estado nga misukol si Cabales ug ang iyang kauban nga si Mateo Suarez (Kaubang Badong) samtang gitunulan sila og mandamyento de aresto. Gihimakak sa mga residente sa barangay nga adunay nahitabong engkwentro.

Sa batan-on pa siya, nag-eskwela si Cabales aron mahimong duktor. Sulod sa pipila ka dekada, nagsilbi siya sa masang Pilipino ug nahimong katabang sa Komiteng Rehiyon sa pagpangulo sa rebolusyonaryong kalihukan sa Panay. Si Cabales nahimo usab nga bilanggong pulitikal niadtong 1999.

Samtang, si Suarez usa ka kanhi myembro sa BHB nga mibiya na pipila ka tuig na ang milabay tungod sa iyang pisikal nga kahimtang. Bisan pa man, nagpabilin siyang matinud-anon ug matinguhaong makatabang ug mosuporta sa rebolusyonaryong kalihukan. Nahimo usab siyang bilanggong pulitikal niadtong 2012.

Panawagan sa mga mag-uuma, gidala sa nasudnong sentro

NAGLUNSAD OG USA ka semanang protesta ang mga organisasyon sa mga mag-uuma kauban ang lain-laing sektor isip paghandum sa bulan sa mga pesante. Aron hata-gag duut ang panawagan sa mga mag-uuma, nagtukod sila og kampuhan atubangan sa Department of Agrarian Reform Central Office sa Quezon City gikan sa Oktubre 15 hangtud 21. Sa kampuhan, gilunsad ang mga pagbisita, pakighiusa, ug diskusyon kauban ang lain-laing sektor. Aduna usay mga *workshop*, *medical mission*, ug paghatag og materyal nga suporta sa mga mag-uuma.

Gawas niini, usa ka rali ang gipangunahan sa Amihan niadtong Oktubre 15 aron handumon ang Kalibutanong Adlaw sa Kababayan-ang Mag-uuma. Niadtong Oktubre 16, subling nagmartsa ang mga grupo sa Quezon City sa pagpanguna sa mga mag-uuma gikan sa isla sa Negros alang sa Kalibutanong Adlaw sa Kagutom. Pagka-ugma, nagprotesta sila sa hedkwarters sa Armed Forces of the Philippines sa Quezon City aron kundenahon ang militarisasyon sa kabanikahan. Usa ka gabii sa pagpasundayag ang gilusad nila kauban ang mga grupo sa artista niadtong Oktubre 19 sa UP Diliman. Nagprotesta usab sila sa Department of Social Welfare and Development niadtong Oktubre 20 aron ipadayon ang pagpangayo og kumpensasyon alang sa mga danyos tungod sa katalagman.

Natapos ang protesta sa mga mag-uuma sa Oktubre 21, anibersaryo sa pekeng reporma sa yuta sa Presidential Decree No. 27 ni Marcos Sr. Nagprotesta sila kauban ang ubang sektor sa Liwasang Bonifacio batok sa korapsyon sa rehimeng Marcos ug sa mga Duterte. Gipanawagan nila ang pagpahawa sa gahum sa duha ka nag-unang kurakot.

Ginasubay sa mga propesyunal ang dalan sa gubat sa katawhan

Atubangan sa nagkagrabeng pasismo sa rehimeng Marcos, labawng nagdilaab ang rebolusyonaryong determinasyon sa mga magtutudlo, duktor, nars, siyentista, inhinyero, ug uban pang mga propesyunal nga misalmot ug misuporta sa gubat sa katawhan. Padayon nilang gipalig-on ang ilang tagsa-tagsang rebolusyonaryong organisasyon aron magsilbing tinubdan sa suporta ug bag-ong mga manggugubat sa Bagong Hukbong Bayan (BHB).



Sa inspirasyon sa kalihukang pagtul-id sa Partido, subling gipakusog ang Katipunan ng mga Gurong Makabayan (Kaguma), Makabayang Samahang Pangkalusugan (MSP), ug Liga ng Agham para sa Bayan (LAB). Lagsik nga namahayag ang maong mga kahugpungan sa mga init nga katilingbanong isyu. Regular o kanunay nilang gipagawas ang ilang rebolusyonaryong mga pangmasang mantalaan: Ang Rebolusyonaryong Lunas ug Dagling Lunas (MSP), Liyab (Kaguma), ug Agham Bayan (LAB).

Mga makinasudnong magtutudlo

Niadntong Enero, gitukod sa Kaguma ang usa ka bag-ong balangay sa usa ka unibersidad. Lakip sa mga napili isip upisyal sa balangay mao ang bag-ong myembro nga si Ka Amber, nga narekrut sa ulahing bahin sa 2024. “Nagkamulo pa ko karon, pero wala gyud ko mobati nga kulang bisan bag-o pa ko tungod sa maayong trato ug pag-alalay sa mga kauban,” matud ni Ka Amber.

Atubangan sa daghang trabaho ug personal nga mga hagit sa kinabuhi, naningkamot siya para sa padayong pagpatuman sa iyang katungdanan isip upisyal sa balangay. Matud niya, naghimo niya kini tungod sa pagsalig ug paghupot sa mga prinsipyo ug pagtubag sa pangutana nga “ngano” ug “para kang kinsa.”

Sumala sa Kaguma, kinahanglan nga palig-onon niini ang kaugalingon aron direktang makasalmot sa armadong pakigbisog, motampo sa

BHB, ug motabang sa pag-organisa sa kabanikahan alang sa pagpanday sa rebolusyonaryong panaghiusa ug pakigbisog sa katawhan.

Pag-ayo sa krisis sa katilingban

Sa usa ka natarang gerilya sa Luzon, misulod ang usa ka grupo sa MSP nga gilangkuban sa mga duktor, propesyunal, ug mga estudyanteng panglawas aron maglunsad og misyong medikal para sa masa ug hukbo. “Sa pagsulod sa sona, dili sayon ang among naagian ug mga kasinatian, ilabina sa kusog nga pag-ulan niadtong tungura,” paambit sa usa ka duktor.

Gitukod nila ang usa ka klinika diin gipahigayon ang konsultasyon sa mga pasyente ug gipaganar ang gamay nga laboratoryo. Gitubag sa MSP ang yano ug kumplikadong mga sakit sa mga Pulang manggugubat, sa lawas man o sa pangisip.

Sulod sa hukbo, nasinati nila ang simpleng kinabuhi, ang mga sakripisyo sa pagpaasdang sa gubat sa katawhan, ug ang mainitong pagdawat sa masang mag-uuma. “Kini nga mga kasinatian mao ang mas nagpalig-on ug nagpadilaab sa akong rebolusyonaryong diwa,” asoy pa sa duktor.

Samtang, naglunsad og asembleya niadtong Agosto 2 ang mga estudyanteng panglawas gikan sa lain-laing unibersidad aron tukuron ang usa ka balangay sa MSP. Daku kining lakang alang sa pagpagakos sa MSP sa mga estudyanteng

panglawas sa demokratikong rebolusyon sa katawhan.

Mga siyentista para sa DRK

Unum ka bulan ang programa sa *tour-of-duty* (TOD) sa BHB ni Ka Langga, myembro sa LAB ug kanhi estudyante sa *computer engineering* sa usa ka pribadong unibersidad. Niining panahona, nagpatigbabaw ang iyang tinguha nga mag-*full-time* na sa kabanikahan. “Sa akong pag-TOD, mas napalig-on ang paghukom nga magpultaym tungod kay ako na kining hingpit nga nakita ug napatud-an ang kahusto ug kapanginahanglan nga magsilbi isip manggugubat,” matud niya.

Iya mismong nasinati ang mainitong pagdawat ug pagmahal sa masa sa hukbong bayan sa larangang ilang gilihukan. “Sila, nga labing gipahimuslan sa katilingban, aduna pay luna nga pakan-on ang mga manggugubat, motabang sa pagkuha og suplay alang sa paglahutay sa hukbo, ug moduyog sa mga rebolusyonaryong kalihukan,” asoy niya.

Sa kasyudaran, padayon usab nga gipanday sa LAB ang mga aktibista ug kadre niini isip mga *full-time* nga organisador sa sektor. Pamaagi usab aron ipataas ang kahimatngon ug kaandamon sa mga myembro niini nga mosubay sa dalan sa armadong pakigbisog sama ni Ka Langga.

Kinutlo gikan sa Liyab, Ang Rebolusyonaryong Lunas, ug Agham Bayan. **AB**

₱243 BILYON unprogrammed appropriations

pagagunitan ni Marcos sa 2026 badyet nga giaprubahan sa House of Representatives. Laip kini sa kinatibuk-ang ₱696 bilyon nga pondong *pork barrel* para sa Malacañang ug Kongreso.



₱10.3 BILYON

nga mga proyektong *farm-to-market* sa 2023 ug 2024 nga badyet ang gipatungan ang presyo og 70%. Labing taas ang ang ₱348,000/metro nga 23 ka pilo nga mas daku sa gitakdang ₱15,000/metro sa DPWH.

82.4%

sa kapin 1.89 milyong mag-uuma sa Eastern Visayas ang walay kaugalingong yuta. Taliwala niini, walay klarong programa sa reporma sa yuta ang reaksyunaryong gubyerno para kanila.

₱8.8 BILYON

lugi sa GSIS tungod sa naluging negosyo sa mga pribadong kumpanya. Hulga kini sa gihaguang tinigum sa mga empleyado sa gubyerno, nga rekisitong igahin sa ahensya alang sa ilang pensyon.



7 sa 14

kooperatiba sa mga drayber sa Iloilo nga nagpailalum sa mini nga programang modernisasyon nahulgang mabangkrap karon tungod sa dili mabayrang utang sa pagpalit sa mahal kaayong *e-jeep*.

37.8 MILYON

Pilipino ang nakasinati sa midyo ug grabeng kawalay pagkaon tungod sa kalisud niadtong 2022-2024. 55 milyon o 44% walay kapasidad nga mopalit og pagkaong may nutrina.



6 kusog nga linog (kapin magnitude 6)

ang mitay-og sa Pilipinas sulod sa 18 ka adlaw nga miigo sa Bogu, Cebu; Manay, Davao Oriental; General Luna, Surigao del Norte ug Pagudpud, Ilocos Norte. Gikan Setyembre 30 hangtud Oktubre 17, narekord sa Phivolcs ang dili moubos sa 14,220 ka *aftershock*, diin 12,704 gikan sa bag-ong nadiskubre nga Bogu Bay Fault.

Gikan sa: Phivolcs

11 ka tuig

sukad nga gipatay ni US Marine Joseph Scott Pemberton ang *transwoman* nga si Jennifer Laude. Bisan gihukmang sad-an, gitanyagan ni Rodrigo Duterte si Pemberton og *absolute pardon* ug gitugutang makauli sa US.



6 ka dekada sa mga kalampusan sa kalihukang mag-uuma sa Eastern Visayas

Atubangan sa kaylap ug nagkagrabeng pyudal ug semipyudal nga pagpahimulos sa Eastern Visayas (EV), angay lamang nga magbalik-lantaw ang masang mag-uuma sa kasaysayan sa ilang hiniusang pakigbisog. Kinahanglan silang mokutlo og mga leksyon ug inspirasyon gikan sa unum ka dekada sa magilakong mga kalampusan nga naangkon sa ilang panaghiusa.

Gamit ang rebolusyonaryong giya alang sa reporma sa yuta sa Partido, milihok ang lapad nga masa sa mga mag-uuma sa EV sa dalan sa pakigbisog aron ipaubos ang abang sa yuta, patas-an ang suhulan sa mga mamumuong-panguma, wagtangan ang usura, ug ipataas ang ilang produksyon.

Sa mga umahan, giatubang sa mga mag-uuma ang mga agalong yutaan (AY) pinaagi sa mga kompromisyon aron ipasunod ang ilang mga katungod. Sa mga koprasan, naangkon nila ang 60-40 nga bahinay sa netong kita nga pabor sa mag-uuma gikan sa naunang bahinay nga 90-10. Natukmod nila ang mga AY nga pas-anon ang 50% sa gasto sa paghakat sa kopras, nga maoy nakapataas sa kita sa mga mag-uuma.

Sa mga lugar nga nakab-ot ang mas taas nga ang-ang sa panaghiusa, napadaug sa mga mag-uuma ang bahinay nga 50-50 diin ginakibhang na ang gasto sa paghakat sa produkto ayha kini bahinon. Kini usa ka kalampusan gikan sa naunang kahimtang diin walay tampo sa produksyon ang AY. Sa mga lugar diin kaylap ang sistemang tersyuhan (1/3 nga bahinay) nga pabor sa AY, napadaug sa mga mag-uuma ang bahinay nga 50-50.

Aduna usay mga dapit diin naduso ang pagpaubos sa interes sa utang gikan sa 20% kada bulan ngadto sa 10%, ug walay tubo kung makabayad sulod sa usa ka bulan. Natangtang usab ang kondisyong tubos sa mga giprendang yuta ug kung naabot na ang 100-150% nga tubo gikan sa gigamit nga kapital, awtomatiko nga ibalik ang yuta sa mag-uuma nga

nagprenda. Naduso usab nga padayonong makaugmad sa giprendang yuta ang mag-uuma aron masigurong aduna siyay ikabayad ug alang sa inadlaw-adlawng galastuhan.

Sa pipila ka mga erya, gipatuman ang kumpiskasyon sa yuta gikan sa mga despotiko ug kontra-rebolusyonaryong agalong yutaan isip porma sa hustisya sa pagpahimulos ug bayad sa utang nga dugo sa masa. Aduna usay mga kaso diin giokupa sa mga mag-uuma ang mga abandunadong yuta sa AY, samtang adunay mga nadamlagang nga AY nga boluntaryong nagpahulam o naghatag sa ilang yuta ug ubang kagamitan sa produksyon.

“Kung wala ang kalihukan, setter sa kaugalingong yuta ang mga mag-uuma,” matud sa usa ka mag-uuma. Hangtud karon, nagapadayon gihapon sila sa pagtagamtam sa dakung tabang ug benepisyo niining mga yutaa.

Padayon usab ang kampanya



aron mapataas ang kapasidad sa produksyon sa mga mag-uuma. Gipalapnag ang kampanyang “tiklos-aglayon” diin kolektibong nagtinabangay ang mga mag-uuma alang sa produksyon. Napalapad niini ang mga umahan, napagaan ug napadali ang trabaho, napamenosan ang gasto, nasiguro nga igo ang pagkaon, ug labaw sa tanan, nabansay ang kolektibong paglihok.

Nag-apud-apud usab og kabaw isip nag-unang gamit sa indibidwal ug komunal nga produksyon. Nagtukod usab ang mga mag-uuma og sistema aron mapahimuslan sa pag-uuma ang mga donasyong traktor ug ubang kagamitan sa produksyon gikan sa mga ahensya sa estado ug pribadong organisasyon.

Natukod ang mga kooperatiba sama sa mga gilingan ug tindahan sa bata kang panginahanglan. Aduna usay kooperatiba alang sa pagbaligya sa ani ug mga produkto sa hustong presyo. Gawas sa serbisyo ug baratong presyo sa mga bata kang palaliton, dugang kita sa kahugpungan ang nakuha gikan sa dibendido. Adunay mga kooperatiba nga nagsilbing puhunan ang kita aron makapalit og kahimanan sa produksyon sama sa yuta ug kabaw.

Kini pipila lamang sa daghang kalampusan sa kilusang mag-uuma sa rehiyon. Padayon nila kining gipanalipdan batok sa gipakusog nga presensya ug walay hunong nga pag-atake sa rehimeng Marcos ug sa mga yunit sa 8th ID sa ilang komunidad. Atubangan sa terorismo sa estado, kining mga kalampusan ug kasinatian mao ang nagasilbing materyal nga basehan aron labaw pang panalipdan sa mga mag-uuma ang ilang kinabuhi ug panginabuhian, ug ipakigbisog ang usa ka katilingban nga tinuod nga demokratiko ug gawasnon. **AB**

Hunong-buto sa Gaza, dili igo; tapuson ang henosidyo

Gipatuman sa Gaza gikan Oktubre 14 ang usa ka hunong-buto tali sa Zionistang estado sa Israel ug sa grupong Hamas nga gipatung-an sa US. Sukwahi sa gipanghinambog sa presidente sa US nga si Donald Trump, kini dili usa ka “regalong diplomatiko,” kundili resulta sa dili mapukan nga baruganan sa katawhang Palestino nga nagdumili sa pagsurender sa ilang nasud. Gatasan kalibong Palestino na ang nagbaktas pabalik sa Gaza City aron hinay-hinay nga ipabarog ang ilang kinabuhi nga gigun-ob sa henosidyo sa Israel.

Taliwala sa kasabutan, padayon ang mga paglapas sa Israel sa mga katungod sa Palestino. Mokabat sa 97 ang gipatay sa mga pwersa niini gikan Oktubre 14 hangtud Oktubre 19. Niadtong Oktubre 19, kalit nga gihunong sa Israel ang pagpasulod sa gatasan ka trak nga nagdala og pagkaon sulod sa Gaza.

Sa pikas tampi, gituman sa Hamas ang probisyon sa paglingkawas sa tanang 20 ka nahabiling buhi bihag. Gisugdan na usab niini ang pagbalhin sa kustodiya sa 23 ka patayng lawas sa mga bihag nga namatay tungod sa paturagas nga pag-atake sa Israel.

Niadtong Oktubre 7 ug mga adlaw human niini, gihandum sa milyun-milyong katawhan sa tibuok kalibutan ang ikaduhang tuig sa Al Aqsa Flood aron suportahan ang makatarunganong pagsukol sa mga Palestino ug makmakon ang henosidyo. Nahitabo ang dagkung mga protesta sa UK, The Netherlands, Spain, Italy, US, Canada ug Japan. Aduna usay mga protesta sa Pilipinas, lakip ang protesta sa mga grupong nasudnon-demokratiko batok sa paggamit sa Israel sa pagkaon ug ayuda isip armas. Niadtong Oktubre 17, naglunsad og kampuhan para sa Palestine ang mga estudyante sulod sa kampus sa Ateneo de Manila University.

Sumala sa mga siyentista ug eksperto, mokabat na sa 680,000 ang kinatibuk-ang napatay sa Palestine, diin 380,000 mga puya ug mga bata nga edad 5 paubos. Ang kapin 68,000 niini direktang gipatay sa mga bomba ug bala sa mga sundalong Israeli.

Nakatala usab ang mga internasyunal nga ahensya og 400 ka namatay tungod sa grabeng kagutom, lakip ang 140 ka bata. Samtang, mokabat sa 3,000 ang napatay samtang nagpaabot o nagkigilogay og ayuda ug pagkaon, daghan sa mga “death trap” sa Gaza Humanitarian Foundation nga gidumalahan sa mga sundalong Amerikano ug Israeli. AB

Petisyon alang sa *interim release* ni Duterte, gibasura sa ICC

GIBASURA SA MGA hukum sa Pre-Trial Chamber 1 sa International Criminal Court (ICC) ang petisyon ni Rodrigo Duterte alang sa *interim release* o temporaryong paglingkawas niadtong Oktubre. Matud nila, daku ang potensyal nga maikyas siya sa hustisya ug hilabtan ang mga saksi, ilabina nga nagpabiling gamhanan iyang pamilya sa Pilipinas.

Gihatagag gibug-aton sa ICC ang impluwensya sa pulitika sa pamilya ni Duterte. Gihisgutan sa korte ang mga pamahayag sa iyang anak nga si Sara Duterte nga nanghinambog nga “iikyas” niya ang iyang amahan gikan sa ICC ug mga akusasyon sa “pagkunsabuhay” sa ICC ug sa gubyrno sa Pilipinas.



Aksyon batok sa demolisyon sa Marikina. Napugngan sa mga lumulupyo sa Agora, Barangay Sto. Niño, Marikina City ang planong demolisyon sa ilang komunidad niadtong Oktubre 15. Nagtukod sila og kampuhan niadtong Oktubre 14. Kapin 53 ka kabus nga pamilya ang nahulgang mapahawa sa komunidad bisan og kapin 40 ka tuig na silang nanimuyo sa lugar. Tungod sa protesta, nagsaad ang lokal nga kagamhanan og relokasyon alang sa mga apektadong lumuluyo.

Barikada sa Benguet. Mikabat sa 400 ka lumulupyo sa duha ka barangay sa Mankayan, Benguet ang nagbarikada niadtong Oktubre 13 batok sa pagsulod sa Crescent Mining and Development Corporation sa ilang yutang kabilin. Nagsilbi usab kining pormal nga pagtukod sa alyansang No Mines Movement of Guinaoang and Bulalacao.

Protesta kontra-mina sa Dupax del Norte, NV. Gikan sa Setyembre 17, nagmuntar og barikada ang mga residente sa Barangay Bitnong sa Dupax del Norte sa Nueva Vizcaya batok sa Woggle Corporation. Migrabe ang tensyon tali sa mga lumulupyo ug kumpanya dihang nag-isyu og Temporary Restraining Order niadtong Oktubre 14 ang usa ka korte sa prubinsya batok sa barikada. Gibungkag sa mga pulis ang barikada niadtong Oktubre 16 ug giaresto ang tulo ka lumulupyo. Nakagawas ra gilayon sila.

Walag too nga gimakmak sa mga residente, simbahan, grupo ug indibidwal ang pagpanghasi sa mga pulis. Naglunsad sila og karaban ug protesta sa Nueva Vizcaya Provincial Capitol niadtong Oktubre 20 aron makmakon ang kawalay aksyon sa lokal nga gubyrno. Naglunsad usab og protesta sa parehong adlaw ang grupong Kalikasan PNE atubangan sa Department of Environment and Natural Resources.

Nakatakda usab nga maglunsad og protesta niadtong Oktubre 21 ang Anakbayan United Kingdom ug ubang nasudnon demokratikong organisasyon sa UK sa upisina sa Metals Exploration PLC Office sa London aron makmakon ang pagkawaw sa kumpanya sa kinaiyahan.

Lain na usab nga kampanyang agresyon ug destabilisasyon sa US batok sa Venezuela

Sukad Setyembre, unum ka sakyang pangdagat gikan kuno sa Venezuela ang gipabusikad sa US sa Caribbean Sea sa akusasyon nga nagdala kini og mga “narko-terorista” ug nagkarga og iligal nga droga. Gihimo ang mga pagpabusikad isip kabahin sa lain na usab nga serye sa agresyong militar sa Venezuela nga walay basehan nga giakusahan sa presidente sa US nga si Donald Trump nga misuporta sa mga “narko-terorista.” Mikabat na sa 27 ang ekstra-hudisyal nga gipatay sa US sa mga pag-atake niini.

Dungan sa mga pagpabusikad, gipakusog sa US ang ilang presensya militar sa Caribbean Sea pinaagi sa pagpadala og mga *warship*, usa ka *nuclear-powered* nga submarino, ug ubang mga sakyang iggugubat. Nagpalupad usab kini og mga helikopter, *fighter jet*, ug mga B-52 bomber sa internasyunal nga airspace duol sa Venezuela.

Gimanduan usab ni Trump ang Central Intelligence Agency nga maglunsad og mga sikretong operasyon sulod sa Venezuela batok sa guberno ug katawhan niini. Kini subay sa anunsiyo ni Trump nga ipatuman ang dugang pang aksyong militar batok sa Venezuela ug pakang pag-usab sa rehimen sa soberanong nasud. Naghatag usab og \$50 milyong *reward* si Trump alang sa pag-aresto sa presidente sa Venezuela nga si Nicolas Maduro. Kini dugang sa nagtunhay nga mga sangsyon sa ekonomiya nga dugay nang gipahamtang sa US ug sa mga aliyado niini sa nasud.

Kauban sa imperyalismong US sa kampanyang agresyon mao ang mga Toong grupo sulod sa Venezuela. Niadtong unang semana sa Oktubre, gibutyag sa guberno ni Maduro ang pagsulay sa maong mga grupo nga maghimo og “false flag” nga opera-

syon diin magtanum ug magpapusi-kad kini og bomba sa *embassy* sa US sa Caracas, ang kapital sa Venezuela, aron painiton pa ang tensyon.

Bisan og sirado ang *embassy* sukad pa sa pagputol sa diplomatikong relasyon sa Venezuela ug US niadtong 2019, adunay mga trabahante ug pwersa sa seguridad nga nagpabilin sa bilding. Human niining balita, gipahunong ni Trump ang bisan unsang paningkamot sa iyang guberno nga magkighinabi ug magkig-alayon sa Venezuela.

Wala nagpatarog ang Venezuela ug guberno ni Maduro sa mga pag-atake ug mga hulga ni Trump. Matud ni Maduro, “Dili gayud sila makasulod sa Venezuela” ug andam ang militar ug katawhang Venezuelang ang ilang nasud ug soberanya.

Kalibutanong suporta sa Venezuela

Malukpanong gimakmak sa mga grupo sa tibuok kalibutan



ang agresyon sa US ug ni Trump sa Venezuela. Nanawagan ang International League of Peoples' Struggle (ILPS) nga batukan ang pagsulay nga ilisan ang guberno sa Venezuela ug tanang porma sa *hybrid* nga pakiggubat nga migrabe ilalum ni Trump.

Walay katapusan ang agresyon sa US sa guberno sa Venezuela sukad nga mibarog kini batok sa mga imperyalistang dikta niini. “Walay katapusan ang pagsulay sa US nga palagputon ang demokratikong pini-li nga guberno sa Venezuela, determinadong sigupon ang kita gikan sa lana sa nasud aron patagbawon ang mga monopolyo kapitalista ug mga negosyante,” sumala sa ILPS.

Sa pamahayag sa grupo, ang agresyon sa US nagtumod lang sa pagsuporta sa daghang katawhan sa kalibutan sa Venezuela ug sa ilang makatarunganong pakigbisog alang sa nasudnong soberanya batok sa imperyalistang US.

Sa Pilipinas, gipangunahan sa Philippine-Bolivarian Venezuela Friendship Association ug Bagong Alyansang Makabayan ang pagsuporta sa guberno ug katawhan sa Venezuela. Hugot silang nakiglambigit kang Chargé d'Affaires Richard Espinoza Lobo sa Bolivarian Republic of Venezuela Embassy alang sa lainlaing mga aktibidad ug panagtapok.

Lakip na dinhi ang ilang pagkigtigum sa mga representante sa Makabayan Bloc sa House of Representatives niadtong Oktubre 18. Nati-buok dinhi ang planong pagsumite sa Makabayan Bloc og usa ka resolusyon sa Kongreso aron makmakon ang militarismo sa US ug suportahan ang pakigbisog sa katawhang Pilipino alang sa kalinaw, nasudnong soberanya, ug katungod sa kaugalingong paghukom sa tanan nasud. **AB**